



Ezbosu Dekretu-Lei kona-ba Pesticida

LA'O HAMUTUK NIA KOMENTÁRIU

[Mariano Ferreira no Maxi Tahu, Peskizadór, La'o Hamutuk]

[22 Marsu 2019]

Komentáriu jerál

- Lei nee adopta prinsipiu di'ak lubuk ida tuir padraun FAO nian no mós pratika ne'ebé aplika iha nasaun barak ne'ebé minimiza impaktu balu husi introdusaun pesticida kímiku sira.
- Timor-Leste tenke investe hodi promove pesticida orgánika.
- Timor-Leste presiza duni atu iha lei pesticida ida ne'ebé rigorozu hodi regula no prevene impaktu negativu husi uza pesticida iha rai laran **maibé lei nee labele sai baze hodi promove sistema agrikultura ne'ebé depende ba pesticida kímiku sira.**
- Bainhira uza ona Pesticida fó liu benefísiu ba kompañia sira duke agrikultór no kria dependénsia ba kompañia ne'ebé prodús Pesticida
- Agrikultura ne'ebé uza pesticida kímiku barak la serve ba kondisaun agrikultura Timor-Leste nian ne'ebé maioria agrikultór iha rai la too hektares rua. Ho rai ne'ebé kí'ik, Timor-Leste iha vantajen boot liu atu dezenvolve sistema agrikultura orgánika no agro-ekologia.
- Uzu adubu kímiku sei hamenus oportunidade Timor-Leste nian atu kompete iha merkadu rejional no internasionál. Ida nee sei akontese tanba ho area produsaun ne'ebé kí'ik, dalan úniku ba Timor-Leste atu kompete iha merkadu rai li'ur maka liu husi mantén nia produktu sira nudár produktu orgánika.
- Pesticida la'ós ai-moruk kímiku úniku iha setór agrikultura ne'ebé presiza regula. Iha mós ai-moruk kímiku seluk iha agrikultura ne'ebé presiza regula hanesan **Herbisida, Insetisida, Fungisida**, nsst, ne'ebé oras nee loja balu promove no fa'an iha rai laran, Tanba nee, lei nee presiza kobre ba matéria kímiku sira bainhira seidak iha lei espesífiku ne'ebé regula ai-moruk kímiku hira nee.

Komentáriu espesífiku

Kapítulu	Artigu (Parágrafu / alínea)	Testu dehan	Komentáriu no sujestaun
I	Artigu 1	Objetu hosi Dekretu-Lei kona-ba Pesticida mak atu regula pesticida sira iha faze hotu-hotu iha sira-nia síkulumoris, inklui dispozisaun rezíduu pesticida, ho objetivu atu proteje saúde ema, animál no ai horis sira-nian no ambiente tasi-laran no rai-laran no mós atu promove produsaun agríkola sustentável iha Timor-Leste.	<p>Konsidera katak ai-moruk kímiku iha setór agrikultura ne'ebé presiza regula la'ós de'it pesticida maibé mós ai-moruk seluk hanesan Herbisida, Fungisida, Insetisida, nsst, ami rekomenda atu aumenta tan fraze ida iha artigu 1 atu halo klaru katak dekretu lei nee sei <i>provizoriamente</i> kobre mós ai-moruk kímiku seluk ne'ebé uza iha setór agrikultura (tanba laiha regulamentu espesífiku kona ba ai-moruk sira ne'e).</p> <p>Ami rekomenda fraze hanesan tuir mai nee: Dekretu lei nee mós aplika ba ai-moruk kímiku seluk ne'ebé uza iha setór agrikultura ne'ebé seidak regula husi lei seluk.</p>
I	Artigu 2. Definisaun	Laiha definisaun ba ai-moruk kímiku seluk	<p>Liga ba rekomendasaun ba Artigu 1, presiza atu inklui mós definisaun kona-ba 'ai-moruk kímiku seluk'</p> <p>Ami rekomenda: Ai-moruk kímiku seluk: katak substánsia, ka kahur hosi substánsia saida de'it hosi ingrediente kímiku ka biolójiku ne'ebé uza hodi proteje ai-horis husi insekta, fungus, no du'ut fuik sira.</p>
I	Artigu 4 Alínea 2	Laiha funsaun monitorizasaun	<p>Importante katak konsellu nee iha mós halo funsaun monitorizasaun nian atu garantia katak konsellu nee hatene loloos saida mak akontese iha rai laran liga ba asuntu pesticida no ai-moruk kímiku seluk.</p> <p>Rekomendasaun: d) halo monitorizasaun ba implementasaun dekretu lei nee no desizaun sira ne'ebé fó sai bazeia ba lei nee. e) asume kargu sira-seluk hanesan define hela iha Dekretu-Lei ida-ne'e.</p>

Kapítulu	Artigu (Parágrafu / alínea)	Testu dehan	Komentáriu no sujestaun
III	Artigu 9	La nakloke ba públiku	<p>Aplikasaun sira tenke publika iha ministériu nia portal/website ne'ebé ema hotu bele asesu nudár dalan ida atu involve públiku iha prosesu rejistrasaun nian. Ida nee mós se garantia katak parte ne'ebé halo rejistu no fó lisensa sei la uza sala sira nia podér.</p> <p>Rekomendasaun: Aumenta alínea ida</p> <p>3) Dokumentu aplikasaun sira (exemptu dokumentu konfidiensial hanesan haktuir iha lei nee) sei publika iha portal/website governu nian atu garante transparénsia no akontabilidade iha prosesu rejistrasaun no halo desizaun.</p>
III	Artigu 13	Konsellu Rejistu Pesticida bele, tuir nia iniciativa rasik, rejista pesticida foun ne'ebé han-malu ho kritériu preskreve	<p>Artigu ida nee loke dalan ba pratika ne'ebé la di'ak tanba fó autorizasaun ba parte balu atu rejista pesticida foun lai liu husi prosesu rigoroza ne'ebé haktuir iha dekretu lee nee.</p> <p>Artigu nee mós loke dalan ba konfliktu de interese no abuzu de podér husi Konsellu Pesticida nian.</p> <p>Ami rekomenda atu hasai artigu nee. Kazu emerjénsia sira bele rezolve kazu pur kazu ne'ebé involve departamentu pesticida, konsellu pesticida no komité asesoria.</p>
III	Artigu 15 Alínea 1b	(b). Ba objetivu emerjénsia spesífiku, atu trata ho peste foun ka atu rezolve problema temporáriu ho relasaun ba disponibilidade ka asesibilidade produktu sira-nian iha merkadu.	<p>Artigu nee ko'alia kona ba permisaun temporáriu ba pesticida la rejistada maibé alínea b) fraze '... ho relasaun ba disponibilidade produktu sira-nian iha merkadu.' halo konfuzaun tanba bainhira produktu sira iha ona merkadu tuir loloos produktu sira nee rejistada ona. Se ida nee liga ba merkadu rai li'ur, presiza halo klaru.</p>
IV	Artigu 16	La temi kona-ba kompañia sira ne'ebé oras nee fa'an ona pesticida, herbisida, insektisida, nsst.	<p>Oras nee kompañia no loja agrikultura balu ativamente promove no fa'an ai-moruk kímiku sira nee. Bainhira aplika dekretu lei nee tenke obriga parte sira nee atu hapara sira nia atividade no tuir prosesu rejistu ne'ebé haktuir iha lei nee.</p> <p>Rekomendasaun: Aumenta alínea ida tan ba Artigu 16</p> <p>5) Operador sira ne'ebé oras nee fa'an ka distribui ona pesticida, tenke halo rejistu fila fali tuir prosesu ne'ebé haktuir iha lei nee, no labele fa'an produktu sira nee bainhira seidak hetan lisensa.</p>